

﴿الحقوا المعلش قبل ما يخلص﴾

تعرفوا أن كلمة «معلش» اللي عمالين نقولها عمال على بطل، وبمناسبة ومن غير مناسبة، وسواء تنفع في الموقف اللي بتتقال فيه ولا لأ. أصلها إيه، أصلها ماعليه شيء، كلمة كده كان ييقولها القاضي زمان لما شخص يحصل على البراءة يعنى برىء يا بيه..!

بس إحنا شعب طبعا له العجب ميسبش حاجة على حالتها وقرر يستعملها استعماله الشخصى.

لما تسأل شخص النهاردة إيه أكثر كلمة بتستفزك؟ هيرد عليك فورا ويقولك «معلش».

الكلمة اللي إحنا أصلا استخدمناها لتطيب خاطر، تحولت فجأة وبقدرة قادر لأكثر كلمة مستفزة لأى شخص، ممكن لأنها أصبحت تتقال بمناسبة ومن غير مناسبة، وممكن كمان لأنك مابقتش واثق في اهتمام الشخص اللي ييقولك «معلش» وممكن

لأنك بقيت متأكد أن الليبيقولك «معلش» يقولها لك من باب الاستسهال.

لاحظت هبة صاحبتى في يوم إنى مضايقة ومتغيرة عن كل يوم ومش مركزة في أي حاجة بعملها، في مبادرة جميلة منها الحقيقة سابت اللى في أيديها وجت وسألتنى مالك فيكى إيه، خير طمئننى عليكى، أقولك على حاجة أحسن تعالى نقعد شوية مع بعض احكىلى إيه اللى مضايقتك وإن شاء الله نلاقى حل.

استجبت لدعوة هبة الكريمة بعد إصرارها على إنى لما أفضفض معاها هرتاح أو هنلاقى حل للمشكلة زى ما أوهمتنى، وبدأت أحكيها فعلا على اللى مضايقتنى، وكان الموضوع فعلا مهم بالنسبة لى ومأثر عليا بشكل سلبي، وكان واضح ده جدا خلال الساعة اللى حكيت لها فيها الموضوع. معلش.. تشربى نسكافيه؟..

ده كان رد هبة بعد ماسمعت حكايتى، وعرفت إيه اللى مضايقتنى، وبالرغم من إنالموضوع كان فعلا مهم وبالنسبة لى خطير، وكنت فعلا محتاجة أي كلام يوصلنى لحلول من أي شخص، إلا إن هبة اكتفت بأنها تقولى معلش، المستفز في الموضوع أكثر إنه خلال الفترة اللى كنت بحكى فيها لهبة على موضوعى بعد إلحاح منها، كانت طول الوقت مشغولة في الموبايل بتاعها وشوية سرحانة وشوية مشتتة يعنى ما كانتش مركزة معايا خالص.

الشيء العجيب في الموضوع أن هبة من الشخصيات اللى عندها فكر، يعنى تقدر تفكر معايا فعلا في أسباب المشكلة، وتقدر بسهولة جدا تلاقى لها حلول، بس هبة فضلت تستسهل وتقولى معلش، وأهى تبقي جاملتنى، يعنى هتسمعى وكمآن هتقولى على حلول.. ده أنا أبقي طماعة قوى.

مشيت من قدام هبة وأنا في قمة الاستفزاز من ردها، وبسأل نفسي ليه ردت عليا الرد ده؟ ليه استسهلت؟ ليه ما أخذتش الموضوع على محمل الجد؟ ممكن يكون في حاجة شاغلة تفكيرها، بس لو كان فيه ليه ألحت عليا وختلتنى أحكيلها على اللى مضايقتنى؟ وبعدين دى كانت طول الوقت مشغولة في الموبايل وبتضحك، يعنى أكيد مفيش حاجة مضايقها، عشرات الأسئلة دارت في بالي بعد رد فعل هبة على مشكلتى بمعلش.

رجعتلها تانى وأنا في قمة الاستفزاز، وقولتلها: يعنى أعمل إيه بـ«معلش» اللى قولتيها لى دى؟ هتفدنى بإيه؟ خلتينى أحكيلك ليه طالما مش هتشوفي معايا حل للمشكلة؟ أجبرتيني ليه إنى أحكيلك؟ ده حتى محاولتيش تناقشينى فيها؟ اكتفيتي بكلمة معلش اللى مش هتفيدنى في حاجة، كان ردها عليا بمنتهى البساطة: «إحمدى ربنا أنك لقيت حد يقولك معلش» وبعدين كيفيكى أنك فضفضتى عن اللى جواكى ومضايقتك، أصلا مبقاش في حد عنده طاقة يحل مشاكله يبقى هيحل مشكلات غيره إزاي،

اسندى نفسك بنفسك وحلى مشاكلك لوحدك، مابقاش حد فاضى لحد حتى لو ماعندوش مشكلات، بجد افرحيان في حد لسه بيقولك «معلش».

يعنى إيه أحمد ربنا إن في حد لسه بيقولى معلش، ويعنى إيه اسندى نفسك بنفسك ومتاخدش رأى حد، آمال ربنا خلقنا في الدنيا كلنا مع بعض ليه؟ وليه خلقنا عقول مختلفة؟ ويعنى إيه كفاية إنى فضفت؟ استفدت أنا إيه بالفضفضة وأنتى مش سمعانى أصلا وسرحانة في حاجات تانية.

يعنى إيه معلش تبقي هي الرد الدائم على كل كلامنا مهما كانت خطورته، لأبقى معلش ياهبة أنا مش عاوزة أففضض من غير حلول، وطالما أنتى مش مركزة معايا أصلا بيقى بلاها معلش.